

Na osnovu Zaključka Predsjedništva Bosne i Hercegovine, broj: 01-50-1-449-42/24 od 21. februara 2024. godine, usvojenog na 11. redovnoj sjednici Predsjedništva, održanoj 21. februara 2024. godine Ministarstvo vanjskih poslova Bosne i Hercegovine o b j a v l j u j e:

## **JAVNI POZIV**

### **Za prijavu kandidata iz Bosne i Hercegovine na pozicije u Vijeću Europe i OSCE:**

#### **01. Europsku komisiju za borbu protiv rasizma i netolerancije (ECRI);**

(Europska komisija za borbu protiv rasizma i netolerancije (ECRI) je tijelo Vijeća Europe, u čijoj nadležnosti je borba protiv rasizma, ksenofobije, antisemitizma i netolerancije u Europi i jedan je od mehanizama za zaštitu ljudskih prava i sloboda.)

Prijavljeni kandidati moraju posjedovati odgovarajuće stručno znanje i iskustvo u oblasti borbe protiv rasizma i netolerancije; da su visokog moralnog ugleda, priznati ekspertu i aktivisti u oblasti poštivanja i zaštite ljudskih prava i koji su svojim doprinosom, kao nezavisni i nepristrasni stručnjaci, stekli ugled u borbi protiv rasizma, rasne diskriminacije, ksenofobije, antisemitizma i netolerancije, u skladu sa Statutom Europske komisije protiv rasizma i netolerancije.

#### **02. Europski komitet za sprječavanje mučenja i neljudskog ili ponižavajućeg postupanja ili kažnjavanja (CPT);**

(Komitet, putem posjeta osobama lišenim slobode, ispituje kako se prema njima postupa sa ciljem da, ukoliko je potrebno, poveća zaštitu tih osoba od mučenja i neljudskog ili ponižavajućeg ponašanja ili kažnjavanja.)

Prijavljeni kandidati moraju posjedovati odgovarajuće stručno znanje i iskustvo, visok moralni ugled, priznati stručnjaci različitih profila, uključujući pravnike, ljekare, specijaliste za zatvorsku ili policijsku oblast, koji su svojim radom stekli ugled u struci kojom se bave, u skladu sa Rezolucijom Vijeća Europe (1248)2001, da su nezavisni i nepristrasni u obavljanju dužnosti.

#### **03. Europsku komisiju za demokratiju putem prava (Venecijanska komisija)**

(Venecijanska komisija je savjetodavno tijelo Vijeća Europe, koje pruža pravnu pomoć državama članicama VE, radi postizanja europskih pravnih i institucionalnih standarda u segmentima demokracije, ljudskih prava i vladavine prava. Na zahtjeve zemalja članica, Venecijanska komisija daje odgovore, preporuke i mišljenja.)

Prijavljeni kandidati moraju biti osobe sa visokim moralom, u skladu sa odredbama člana 2. stav 1. Revidiranog statuta Venecijanske komisije, da su ugledni pravni stručnjaci, eksperti u oblasti unutarnjeg, međunarodnog ili ustavnog prava, koji su stekli ugled u razvoju i demokratizaciji institucija, da su nezavisni i nepristrasni stručnjaci, koji su se dokazali u pravnoj oblasti zaštite ljudskih prava.

#### **04. Grupa eksperata za borbu protiv trgovine ljudima (GRETA)**

(GRETA je mehanizam Vijeća Europe za provođenje Konvencije Vijeća Europe o borbi protiv trgovine ljudima, u skladu sa Rezolucijom Vijeća Europe CM/Res (2013)28. GRETA se sastaje na plenarnim sjednicama tri puta godišnje, obavlja posjete, priprema i objavljuje izvještaje o zemljama koji se odnose na ocjenu zakonodavnih i drugih mjera koje su poduzele ugovorne strane Konvencije u vezi sa primjenom odredbi Konvencije. Osim toga, GRETA redovno objavljuje opće izvještaje o svojim aktivnostima.)

Prijavljeni kandidati moraju biti visokog moralnog ugleda, priznati eksperti u oblasti ljudskih prava, da posjeduju iskustvo, usko povezano sa borbom protiv trgovine ljudima, pomoći i zaštiti žrtava ili imaju profesionalno iskustvo u oblastima obuhvaćenim Konvencijom, da su nezavisni i nepristrasni u obavljanju svojih dužnosti. (Model za CV dostupan na: Appendix to Resolution CM/Res(2013)28)

#### **05. Predstavnike i njihove zamjenike u OSCE Sudu za povjerenje i arbitražu**

(Sud za pomirenje i arbitražu, sa sjedištem u Ženevi, je mehanizam Organizacije za europsku sigurnost i saradnju (OSCE), kojim se omogućava mirno rješavanje sporova između država. Njegov rad se zasniva na Konvenciji u okviru OSCE-a o pomirenju i arbitraži. Svaka država, članica Konvencije, može nominovati 2 (dva) miritelja i jednog arbitra i jednog zamjenika. Članstvo u Sudu ne podrazumjeva zasnivanje radnog odnosa, ne isključuje radni odnos u Bosni i Hercegovini ili inozemstvu, osim u slučajevima sukoba nadležnosti ili nespojivosti funkcija. Bosna i Hercegovina ne snosi troškove u vezi sa članstvom i funkcijom u Sudu.)

**Podnosioci prijava pod rednim brojem 01. do 04. moraju ispunjavati sljedeće opće uvjete:**

- Da je državljan Bosne i Hercegovine;
- Da ima univerzitetsku diplomu, odnosno da ima odgovarajući nivo obrazovanja i odgovarajuće stručno znanje i iskustvo za obavljanje dužnosti na koju se imenuje;
- Da je afirmisani djelatnik u diplomatskoj službi Bosne i Hercegovine, odnosno da je istaknuti politički, privredni, javni ili naučni djelatnik koji je dao znatan doprinos Bosni i Hercegovini i vrlo aktivno radi na jačanju međunarodnog subjektiviteta i ugleda Bosne i Hercegovine u svijetu;
- Da ima aktivno znanje engleskog ili francuskog jezika (znanje više stranih jezika uzima se u obzir pri izboru kandidata kao dodatni kvalitet);
- Da se ne vodi krivični postupak protiv tog lica;
- Da nisu obuhvaćeni odredbom člana IX.1 Ustava Bosne i Hercegovine.

**Podnosioci prijava pod rednim brojem 05. moraju ispunjavati sljedeće opće uvjete:**

- Da su državljani Bosne i Hercegovine;
- Da se ne vodi krivični postupak protiv tog lica;

- Da ima univerzitetsku diplomu, odnosno da ima odgovarajući nivo obrazovanja i odgovarajuće stručno znanje i iskustvo za obavljanje dužnosti na koju se imenuje;
- Da je afirmisani djelatnik u diplomatskoj službi Bosne i Hercegovine, odnosno da je istaknuti politički, privredni, javni ili naučni djelatnik koji je dao znatan doprinos Bosni i Hercegovini i vrlo aktivno radi na jačanju međunarodnog subjektiviteta i ugleda Bosne i Hercegovine u svijetu;
- Da aktivno vladaju engleskim jezikom;
- Da nisu obuhvaćeni odredbom člana IX 1. Ustava Bosne i Hercegovine.

**Uz prijavu na Javni poziv, kandidati moraju priložiti sljedeće dokumente (ovjerenu kopiju):**

- Biografiju, na jednom od službenih jezika BiH, sa kontakt podacima (broj telefona, e-mail, adresa, prebivalište);
- Biografiju (prema specifičnom modelu dostupnom na web stranici [www.mvp.gov.ba](http://www.mvp.gov.ba)) na jednom od službenih jezika Vijeća Europe (pozicije 01,02 i 04.);
- Biografiju, na engleskom jeziku (pozicija 05.);
- Ovjerenu fotokopiju Univerzitetske diplome odnosno nostrifikovanu diplomu, ukoliko je fakultet završen izvan BiH, nakon 1992. godine, a za kandidate koji su studij završili prema Bolonjskom načinu studiranja obavezno je dostaviti i Dodatak diplome; iznimno, samo u slučaju da visokoškolska ustanova dodatak diploma nije uopšte izdavala, niti za jednog diplomca, kandidat je dužan da uz ovjerenu kopiju univerzitetske diplome dostavi uvjerenje visokoškolske ustanove da dodatak diploma nije uopšte izdat, niti za jednog diplomca;
- Dokaz o radnom iskustvu u navedenim oblastima;
- Uvjerenje o aktivnom znanju engleskog ili francuskog jezika (pozicije od 01. do 04.);
- Uvjerenje o aktivnom ili pasivnom znanju drugog jezika;
- Uvjerenje o državljanstvu, ne starije od šest mjeseci;
- Uvjerenje o nevođenju krivičnog postupka, ne starije od šest mjeseci;
- Izjava ovjerena kod nadležnog organa da kandidat nije obuhvaćen odredbom člana IX 1. Ustava Bosne i Hercegovine

Podnosioci prijava, u pisanoj formi, pored ostalog, trebaju da navedu i motiv podnošenja prijave na Javni poziv, te obrazloženje zbog čega smatraju da su osobe koje mogu obavljati naprijed navedene poslove, te da navedu iskustva iz oblasti prava, ljudskih prava i razvoja demokratije. Prijava mora biti svojeručno potpisana.

Dostavljene prijave, sa kompletnom traženom dokumentacijom, bit će proslijeđene Predsjedništvu Bosne i Hercegovine na dalje postupanje.

O prijavljenim kandidatima, od strane Bosne i Hercegovine (pozicije od 01. do 04.) odlučuje Predsjedništvo Bosne i Hercegovine, u skladu sa svojim ustavnim ovlaštenjima.

Predsjedništvo Bosne i Hercegovine, u skladu sa svojim ustavnim ovlaštenjima, vrši odabir četiri kandidata iz BiH (2 miritelja, jednog arbitra i jednog zamjenika arbitra) (pozicija 05.) i predlaže njihovu nominaciju u Sud za pomirenje i arbitražu. Konačnu odluku o imenovanju nominovanih kandidata iz BiH donosi Biro Suda, u skladu sa Pravilnikom o osoblju, koji usvajaju države potpisnice Konvencije.

**Rok za podnošenje prijave kandidata je dvadeset (20) dana od dana objavljivanja Javnog poziva.**

Prijave na Javni poziv, sa kompletnom dokumentacijom, potrebno je dostaviti neposredno li putem pošte, preporučeno, na adresu: **Ministarstvo vanjskih poslova Bosne i Hercegovine; ul. Musala 2; 71000 Sarajevo, sa obaveznom naznakom „Javni poziv – Vijeće Europe/OSCE“.**

Nepotpune i neblagovremene prijave neće se uzeti u razmatranje.